

# Dr Pfannehou - Air

*Catering 2002*

Wäg däm Chrütz am Schwanz - pardon ar Flosse  
si Tinte, Schtütz und Träne gflosse  
Chrütz wird zum Witz, wäg Schtütz gitt's Chritz:  
Ja, s'isch es Chrütz mit däre Schwiz

Swissair minus Air gitt Swiss  
Wi viil Biss hett ächt dä Kompromiss ?  
Oder blibt is bis zum Schluss  
nume Swiss - und d Luft isch duss ?  
Schad um all di andre Näme  
wo me sech grad so schön chönnt schäme

## **Sorry-Air - sorry: Spörry-Air**

Wo d Frou Spörry di Million hett gschpändet  
han'i mi a d Schtüürbehörde gwändet:  
"Mi Schtüürbetrag", ha n'ig beschide,  
"isch e Franke drissg - dihr sitt doch zfride ?"

Sitt d Schpörry dr Swissair-Lade schmeisst  
weiss i äntlech, was "Guldvreneli" heisst  
No besser weiss i, was's wott heisse,  
wenn öpper tüeg e Lade schmeisse

## **Schtrubelpet-Air**

Der Suppenkaschpar trotzt und schpricht:  
"Die Swissair-Suppe ess ich nicht !"  
Dr Ospel-Mohr macht d Grounding-Finte:  
Itz hockt dr Chaschper i dr Tinte !

Ds Personal bi däm Gezeter  
isch no schrüber als bim Schtrubelpeter:  
Dr Gullotti isch ou da mit 10 Million vom Kuoni  
und wenn er wider abhout hout er's sicher  
nid ohni

O d Verwaltigsrät vor Swissair  
trage schwär a ihrne Pöschte:  
Si trage d Verantwortig u mir trage d Chöschte  
trulla-dirulla, trulladiho  
Säget, wi lang blibt äch das no n'eso ?

## **Schnurr-Air**

Swisscom und Swissair chöi's bezüge:  
Mit Gschnurr verdiensch meh als mit Flüge  
O würd dr Bush - i mah nid lüge -  
mit sim Gschnurr doch mau uf d Schnure flüge

### **Läng-Air**

Mit Ovo chasch es immer lenger  
Ou d Telefonnummere, wo mer müesse  
    ischtelle,wärde itz de wider um drei  
    Schtelle lenger ---  
chli chürzer gseit und ou chli kesser:  
Nid alls, wo läng isch, isch ou besser

### **Loch-Air**

Ja-ja, nei-nei, ja-nei, nei-ja  
Öb ds Neu-Fudi doch es Loch söll ha ?  
Outo i ds Loch - eso gitt's Rueh  
Outo dinn - Loch wider zue !

    Mi tünkts, dä Schpruch, dä kenn'i doch ?  
    Lang isch's här: "Weit drrrr es Loch ?"

### **Bloch-Air**

Dr Blocher und sis Göttichind  
hei Charte gschpilt. Dr Blocher gwinnt  
Da chräjit dr Chlii, gar nid verläge:  
"Ätsch, hesch vergässe, UNO z'säge !"

### **Bummgartn-Air**

I ha's gseh cho, ganz im Vertroue  
dass dä Chlous mal muess en Unfall boue  
Wüll mit tuusig Schtung im Fonds vom Chare  
hett no keine lehre Outo fahre

    Liebe Schtapi mit dir' Limousine:  
    Hock lieber wider hinger ine !

Dr Schtapi muess itz Fitness mache  
Dr Schpiegu zeigt: 's gitt nümme z lache  
Är luegt si Trummle, dänkt a ds Faschte  
u süüfzget: Ja, die Zäntrumslaschte ...

### **Bern-Air**

Tschäppät seit Guggisbärg: "Guet Nacht"  
Ds Fröschli hett es Ggümppli gmacht  
Di and're vier göh i Pension  
Da'sch dr Gmeindrat i dr Schpar-Version

### **Fehl-Air**

Im Bundeshuus fähle d Millione  
Im Rathuus fähle d Subvention  
Im Weisehuus fähle d Weisechnäbli  
und im Amtshuus fählt es Gitterschtäbli